

SEHLA SA LEKGETHO SA 2019 - SARS E NKA MOHATO O MONG WA HO NTLAFATSA TSHEBELETSO HO BALEFALEKGETHO

Pretoria, 4 Phuptjane 2019 – Ditshebeletso tsa Lekgetho tsa Afrika Borwa (SARS) di ntlafaditse mokgwa wa ho faela ka inthanete mmoho le makaleng a SARS ka tshebediso ya mekgwa e fapaneng ya boiqapelo bakeng sa Sehla sa Lekgetho sa 2019 ka sepheo sa ho nolofaletsa balefalekgetho ho faela dikgutliso tsa bona tsa lekgetho la lekeno.

Mekgwa ena e boiqapelo e akareditse ho ntshuwa ha ditsebiso tse hlophisitsweng tse qollang ditokomane tse itseng tse hlokehang ebang ho na le oditi kapa netefatso mmoho le sephetho se akantsweng pele molefalekgetho a ka faela.

Se kgannang diphetoho tsena ke maikemisetso a tshebeletso e ntlafetseng, ho fetohela dikanaleng tsa inthanete tse kang eFiling le SARS MobiApp ho bebofatsa dikgutliso tsa lekgetho la lekeno (sena ha se a akaretsa dikgutliso tsa lekgetho la nakwana), le ho boela re ntlafatsa bokgoni ba rona ba ho lemoha ho se ikobe tefo ya lekgetho.

SARS MobiApp e ntlafaditsweng e tla etsa hore ho be bonolo le ho feta ho sebedisa selfounu ya hao ya moraorao tjena ho faela kgutliso ya lekgetho la lekeno e seng tshopodi hakaalo ka lebaka la tsena tse ntjha:

- mokgwa o bonolo wa tshebediso
- ho thakgolwa ha netefatso ya *biometric*
- mokgwa o mong hape wa tshireletso wa *one-time pin*
- bokgoni ba ho teha botjha *username* le *password*
- dipotso tse mabapi le tshireletseho
- mmoho le ho skenuwa le ho hlomathiswa ha ditokomane tsa tshehetso.

Mokgwa o mong wa inthanete, e leng eFiling, o se o ntlafaditswe hore ho be bonolo ho etsa tse hlokehang ha o batla ho faela kgutliso, ho fana ka ditokomane tsa tshehetso le ho lefa mmoho le nyalano e ntlafatseng ya *browser*.

Monongwaha balefalekgetho BOHLE ba welang mokgahlelong ona HA BA HLOKE ho nehelana ka kgutliso ya lekgetho.

- Paloyohle ya lekeno la bona ka selemo pele ho kgulo ya lekgetho ha le fete R5000 000
- Ba fumana lekeno la mosebetsi ho tswa ho MONGAMOSEBETSI A LE MONG FEELA selemong seo kaofela ha sona.

- Ha ba na mofuta ofe kapa ofe o mong wa LEKENO (o kang alawense ya koloj, lekeno la kgwebo, lekeno la rente, tswala e lefiswang lekgetho kapa lekeno la mosebetsi o mong)
- Ha ba na dikgulo dife kapa dife tsa tlatsetso tse dumelletsweng ho ka hulelwa lekgetho tseo ba ka di tsekang (tse kang ditshenyehelo tsa kalafo, dikabelo tsa ho beha meja fatshe le ditshenyehelo tsa maeto).

Ho tswela pele ho fokotsa maeto a sa hlokalang ho leba makaleng a SARS, balefalekgetho ba sa hlokgeng ho faela dikgutliso ba tla fumana sephetho se akantsweng ho tswa ho SARS ho tshwana feela le ha ebe ba ne ba faetse kgutliso. Molefalekgetho a ka ananela sephetho sena kapa a ntjhafatsa kgutliso a nto e faela.

Sehla sa Lekgetho sa 2019 se qala ka la 01 Phato, bakeng sa balefalekgetho ba faelang dikgutliso tsa bona tsa lekgetho makaleng a SARS.

Le ha ho le jwalo, balefalekgetho ba tla leba makaleng a SARS ba tla kgothaletswa ho ingodisa jwalo ka basebedisi ba eFiling le MobiApp. Hang feela ha ba se ba ngodisitswe dikanaleng tsena tse pedi tsa inthanete, basebetsi ba rona ba tla ba bontsha ka moo dikanale tsena tsa inthanete di sebetsang kateng ho faela dikgutliso tsa bona tsa lekgetho ka mokgwa o bonolo feela. Makala a SARS a tla fana ka *wi-fi* ho balefalekgetho ba sebedisang eFiling kapa MobiApp tsena.

Balefalekgetho ba ingodiseditseng eFiling kapa ba nang le phihlelo ya MobiApp ba ka faela dikgutliso tsa bona tsa lekgetho la lekeno ho tloha ka la 1 Phupu ka tshebediso ya dikanale tsena.

Matsatsi a makgaolakang a Sehla sa Lekgetho a eme tjena:

31 Mphalane 2019 bakeng sa ba faelang makaleng.

4 Tshitwe 2019 bakeng sa balefalekgetho bao e seng ba nakwana ba sebedisang eFiling le MobiApp.

31 Pherekong 2020 bakeng sa balefalekgetho ba nakwana ba sebedisang eFiling.

SARS e leboha balefalekgetho bohle ba ikobelang boitlamo ba bona ba ho lefa lekgetho. Re ikemiseditse ho tswela pele ka mosebetsi wa bohlokwa ho netefatsa hore ho na le boitshwaro bo babatsehang ba tefo ya lekgetho le tlwaelo ya ho ikobela tefo ya lekgetho ka boithaopi. Re tla thusa balefalekgetho ka lesedi la bohlokwa:

- Ho utlwisisa boitlamo ba bona ba ho lefa lekgetho,

- Ho ba nolofaletsa ho ikobela tefo ya lekgetho, mme

- Moo ho hlokehang, ho dumella SARS ho etsa tsohle tse matleng a yona ho netefatsa hore boikobelo bo ba teng.

Ka tshebedisano le bakgathatema kaofela, SARS e tla tswela pele ho hahamallela boitshwaro bo babatsehang ba ho aha mmuso o nang le bokgoni, wa demokrasi le o kgothaletsang kgolo ya ikonomi mmoho le ntshetsopele ya setjhaba molemong wa Mafrikaborwa bohle.